

Aenden Const-minnenden , Deught-rijcken
ende seer Discreten Heere

D'H E E R

ANTHONIO VAN LEYEN

Voonende binnen de Keyserlijcke Stadt
van Antwerpen , den 10. Februarij
Anno 1662.



Enghesien seer weet-lievenden Heer ick lanck gheweten heb dat
V. L. begaest is met een uytnemende kennisse vande hooch-gheachte
vry Schilder-const, die van V. L. ten hoochsten bemint ende in
weerden ghehouden wordt, ghelijck den costelijcken Schat van V.
feldsaeme ende uyt-ghekeurde stucken van Schildry, daer van ghetuyghenis
ghenoch gheven. Soo hebbe ick my langhen tijdt veel willigher als vermo-
ghende ghevoelt, om V. L. (als rechten Bescherm-heer vande Schilders) dit
mijn Gulden Cabinet der Schilder-const op te draghen, het welck my niet
onvoeghelijk en docht, aenghesien door desen onbrekelycken ende lanck ver-
wachten Peys tusschen de twee machtichste Croonen van Spaignien en Vranck-
rijk alle Consten wederom sullen floreren, nu sy verlost zijn uyt de bloedt-
dorstighe slaverny vanden wreeden Oorlogh. Verhopende dat t'selve werck
V. L. sal aenghenaem wesen insiende de liefde die mijnen jever (tot verhef-
finghe der vermaerste Gheesten ende Lief-hebbers der Schildry) heeft aen-
ghedreven ende verweckt om den grondt van dese wetenschap eenichsints uyt te
wercken, niet sonder eerst van V. L. vernustheyt raedt ende oorlof ghevraeght
hebbende, eer dat ick t'selve heb derven bestaen, want volghende de Lesse
vanden wijzen SALOMON : De Tonghe der Wijse maect de Leere
lieffelijck. Soo en twijffel niet oft dit mijn werck sal door V. L. bescher-
minghe

minghe aen een jeder aenghenaem ende lieffelyck bevonden, ja van alle Lasteraers bevrijdt worden. Ick bekenne dat mijn vleughels van verstandt te swack zijn, om de kracht van sulckdanighe Const te verheffen: Ick wete wel dat het ander Voorfnyders souden moeten wesen, om soo-danich werck voor te dienen ende op te rechten, eer jemandt den vollen smaect daer van soude ghevoelen. Maer ter wijlen de loffelycke Pictura my soo veel wetenschap van haer verholen Const heeft mede ghedeylt, dat ick my eenichsints heb derven verstouten om haeren Loff ten voorschijn te brengen, siende datter niemandt der Const-minnende Geesten met desen lust bevrucht en is. 'Tis waer dat jemant anders letter-condigher ende reden-rijcker als ick, dese eer der Schilders had connen uyt-drucken. Maer t'is grootelijckx te beduchten (by aldien hy selver gheen Schilder oft Kennis-hebber van dese Const en waer) oft hy de eyghenschappen van Pictura sou hebben connen treffen, niet dat ick hier mede wil doen verstaen dat ick my selven daer toe gans bequaem sou kennen, waer over ick my niet en beroeme, daerom en sal Momi tongh daer uyt gheen voetsel willen trecken, want t'selve sou wesen een specie van hooverdy, al oft ick hoogher sou willen vlieghe als een ander, waer door ick mocht comen tot eenen leeghen val. Maer midts een ander (sijnde vande Const) gheenen lust oft jever en heeft, om sulckdanighen werck met beter gheleghentheydt van wetenschap, ende grooter verstant aen te vatten, soo heb ick t'selve gedaen. Hopende seer voorsinnich Heer dat t'selve werck, ghemenght zijnde met goetjonsticheydt ende vervrempt van diepsinnighe reden, met een willich hert ontfanghen ende aenghenomen sal worden, des ick dit mijn cleyn vermoghende werck V. L. op offer, en stelle inde bewaernisse van V. L. rijpe voorsichticheyt, wensende hier mede aen V. L. ghesontheyt, peys, voorspoet, ende lanck leven op dese wereldt, ende naermaels d'eenwighe Salicheyt blijvende

Seer Konst-lievende Heer

V. L. onderdanighen ende dienstwillighen Dienaer

CORNELIS DE BIE.

VOOR-